

**1058 [102b-2] Müteferrika Mustafa b. Mehmed'in, narh teftişi yapan
Üsküdar kadısı ile Yayabaşı Hamza Subaşı ve Subaşı Müstedâm'a
saldırıp hakaret ettiği**

Sa'âdetlü sultânım hazretlerinin hâk-i pâ-yı şerîflerine arz-ı dâî-i bî-mikdârları budur ki

Bu dâîleri mahrûse-i Üsküdar'da vâki' olan esvâkda narh ahvâlin tecessüs ve men' için Üsküdar'da eşkiyâ zâbiti olan Yayabaşı Hamza Subaşı kulları ve subaşı Müstedâm bendeleri ile gezip narh yoklanırken kasaba-i merkûmede sâkin olup el-müteferrika altmış birinci cemâ'atden Mustafa [b.] Mehmed bendelerinin aslâ medhali ve alâkası yok iken merkûm Mustafa gelip kavgaya mübâşeret edip Yayabaşı Hamza Subaşı bendeleri yanında olan yeniçeri yoldaşları ile men' murâd edindikde memnû' olmayıp her birine itâle-i lisân edip meğher merkûm Hamza (...) terk-i edeb edersin deyu men'a mütesaddî oldukda merkûm yayabaşı bendelerine şütûm-ı galîza edip sakalın yolup ve kazıkla dövüp seni helâk ederim deyu (...) (...) şirret-i şekâvet edip terk-i edeb ettiğinden mâ'adâ bî-garaz Müslümanlar (...) ve şiddet ve şekâvetten hâlî değildir hakkından gelinmek üzre (...)

**1059 [103a-1] Ayşe bt. Davud'un annesi Aynî Hâtun'u öldürenlere
açtığı cinayet davası**

Mahmiye-i Kostantiniyye'de sâkine olan Ayşe bt. Davud tarafından husûs-ı âtiye nehc-i şer'î üzre vekâleti sâbite olan fahrü'l-meşâyihî'l-kirâm Mevlânâ Hüsameddin b. Hasan -zîde takvâhu- mahfil-i kazâda mahrûse-i Üsküdar'da vâki' merhûm Rüstem Paşa'nın vakıf odalarında sâkin olan Mustafa b. Şaban ve Dimo v. İstemad mahzarlarında vekîl-i müşârunileyh Mevlânâ Hüsam Efendi takrîr-i kelâm ve ta'bîr-i merâm eyledi ki müvekkilemin vâlidesi Aynî bt. Abdullah odalarda bunlar ile olup gece ve gündüz musâhabetleri bir yerde idi bir Cuma gün merkûme Aynî Hâtun'u Kavak İskelesi'nde kayığa koyup alıp gitmişler ol zamândan beri gâ'ibedir mezbûrlardan suâl olunsun dedikde bi'l-muvâcehe merkûm Dimo v. İstemad'dan vâki' hâl suâl olundukda merkûm Dimo v. İstemad cevâb verip dedi ki mezbûre Hatice ve zevci Mustafa b. Abdullah ve Mustafa b. Şaban ve hâtunu Fâtıma bt. Abdullah ve mûmâileyh Şeyh Efendi'nin müvekkilesi Ayşe'nin vâlidesi Aynî Cuma gün Kavak İskelesi'ne gelip Üsküdar'dan binip size gideriz deyip adalara doğru ben ve Mustafa b. Şaban kayık çekip Hatice ve zevci Mustafa ve Aynî iki ibrik arak getirmişler Kızkulesin dolaştıktan sonra arak içtik mest oldular Aynî ayrılarak Kızıl Ada'ya doğru çektirip Ada'ya vardık adaya çıktılar Kızıl Ada'da dahi arak içip bana iki Mustafa Aynî'nin boynuna vur deyu teklîf ettiler ben dahi vurmadım sizi katl ederiz yâhud Aynî ile deyu ikdâm